

auffs einfeltigste beschehen. Es weiß je aber mein  
 Treuer Gott/ der aller Menschen Herzen vnd Ge-  
 dancken weiß/ Psal: 7. & Matt: 12. Vnd Ihme nichts  
 vnerborgen/ Syr: 16. Daß mir weder Sinn noch  
 Gedancken darauff gestanden/ daß ich/ der vor sein  
 grosses Vnvermögen wol weiß/ Ihrer Wohlthätigen  
 Gn: (O wolte Gott/ Dieselben hetten noch lang/  
 lang/ im Leben/ vnd ihren wollöblichen Regiment/  
 durch Gottes Willen/ vor sein können) die Leichpre-  
 digt thun solte/ wann es mir nicht von J. Gn: selb-  
 sten/ am Sonntag Cantate, nach deroselben allgemei-  
 nen herrlichen vnd ober alle massen Christlichen  
 Glaubens Bekändtnus in vieler bey sein/ auch mei-  
 nes Herren Collegæ allhier/ were an vnd auffgetra-  
 gen worden/ Viel weniger mir auch in Sinn kömen/  
 daß diese einfeltige schlechte vnd damals gehaltene  
 Predigt solte typis publicirt, vffgelegt vnd gedruckt  
 werden. Denn ich mein lebtag nicht so Ehrfüchtig  
 gewesen/ viel weniger mein Thun also geachtet/ daß  
 es Druckens werth sein solte/ Sintemal mir gar  
 wol bewust/ was jetzt zu vnser Zeit für ein doctissi-  
 mum seculum ist/ was für tieff vnd hochgelehrte  
 Leute es gibt/ die manch wunder schöne Bücher dru-  
 cken lassen/ auch leicht keiner gefunden wird/ wenn  
 er auch die geringste Leichpredigt solte außgehen las-  
 sen/ der nicht zuvor in solchem excellirte vnd ein er-  
 fahrner Meister desselben erfunden würde. Dis kan  
 ich

Psal: 7. v. 10.  
 Matth: 12. v. 25.  
 Syr: 16. v. 16.  
 17. 18. & seqq